

1.06 THAUM TSWV YEXUS YOG MENYUAM HLUAS

Lukas 2

Tej zaug nej twb tau hnov txog zaj uas Tswv Yexus los yug lawm. Tus timtswv los hais rau tus ntshais Malis tias nws yuav xeeb tub thiab tus menyuam tub ntawd yog Vajtswv Leejtub. Malis thiab nws tus txiv, uas yog Yauxej, tau mus hauv lub nroog Npelehees, qhov ntawd yog qhov chaw uas Tswv Yexus tau los yug ntag.

Thaum vajntxwv Helauj hnov zaj no. Nws ntshais tias yuav muaj Vajntxwv tshiab los kav, nws thiaj xav muab Tswv Yexus tua. Tiamsis Vajtswv twb qhia rau Yauxej hauv kev npausuav lawm kom koj tsev neeg tawm mus rau tebchaws Iziv. Nyob nraw lawv yuav dim.

Lub caijnyoog dhau mus, Helauj tuag lawm. Ib tug timtswv hais rau Yauxej hais tias zaum no koj cia li koj ob niamtub rov qab mus pem tebchaws Naxales. Ntawd yog lub zos uas Tswv Yexus loj hlob. Nws loj hlob khov kho rau sab ntsujplig thiab muaj kev ntse ntsuav. Vajtswv nrog nraim nws nyob.

Txhua lub xyoo Tswv Yexus niam thiab txiv yuav tsum mus koom Kevcai Hla Dhau rau nram nroog Yeluxalees. Kevcai no yog ua nco txog lub caijnyoog uas cov neeg Yudais khiavdim ntawm tebchaws Iziv los thiab koj lawv los nyob rau lub tebchaws uas Vajtswv coglus rau lawv. Txhua lub xyoo muaj neeg coob heev mus rau Yeluxalees koom Kevcai no.

Thaum Tswv Yexus muaj kaum ob xyoos, Nws nrog niam thiab txiv mus txog hauv lub nroog Yelexalees koom Kevcai Hla Dhau. Lawv yuav tsum mus kotaw ntau hnuv thiaj mus txog chaw. Lawv nrog tej neeg coob coob ua ke. Txawm yog kev deb heev los zaum no yog ib tsav uas lawv mus ua ke lom zem kawg li.

Ob peb hnuv ntawd, txhua tus yeej zoo siab heev. Thaum twb txog caij rov qab los, Tswv Yexus tseem ua qab rau nram lub nroog Yelexalees. Thaum chivthawj Malis thiab Yauxej tsis nco txhawj txog Yexus li rau qhov muaj neeg coob heev nrog lawv ua ke, nkawd thiaj xav hais tias Tswv Yexus twb nrog nws cov phoojywg lossis tej neeg hauv zos ua ntej lawm. Tiamsis tom qab uas rov los tau ib hnuv ke, nkawd pib nrhiav nkawd tus tub. Malis thiab Yauxej thiaj nug nkawd cov phoojywg, tiamsis tsis muaj leejtwg pom. Malis thiab Yauxej pib txhawj. Nkawd thiaj rov qab mus nram lub nroog Yelexalees nrhiav Tswv Yexus.

Yauxej thiab Malis mus nrhiav Tswv Yexus txhua qhov hauv lub nroog. Nkawd pib txhawj. Tiamsis peb hnuv tom qab, Nkawd nrhiav tau Tswv Yexus. Tswv Yexus tabtom nyob hauv lub Tuamtsev, nrog cov Xibhwb uas qhia Vajtswv Kevcai ua ke. Nws tabtom mloog lawv qhia thiab nug lawv. Tej uas nws nrog lawv sib tham ntawd ua rau lawv xav tsis thob txog Tswv Yexus kev totaub thiab xav tsis thoob li.

Thaum Malis thiab Yauxej pom Tswv Yexus nyob hauv lub tuamtsev nkawd kuj xav tsis thoob kiag li thiab. Malis thiaj hais rau Tswv Yexus, “Tub, ua cas koj ua li ntawd rau wb? Koj txiv wb nrhiav koj txhua qhov hauv lub nroog no thiab wb txhawj koj heev!” Tswv Yexus teb hais tias, “Ua cas neb yuav nrhiav kuv? Neb tsis paub hais tias kuv yuav tsum nyob qhov chaw uas Kuv Txiv ua haujlwm los?” Ua rau Malis thiab Yauxej tsis totaub tej uas Tswv Yexus hais li. Nkawd tsis xav hais tias Tswv Yexus yog Vajtswv Leejtub.

Tswv Yexus lawv rov qab los pem lub nroog Naxales thiab ua lub neej mloog niamtxiv lus. Malis muab tej uas tshwmsim ntawd cim rau nruab siab. Tswv Yexus sab nqaij tawv thiab sab ntsujplig puavleej loj hlob tuaj. Nws ua tau haum Vajtswv siab thiab haum neeg siab tibi.

1.06 THAUM TSWV YEXUS YOG MENYUAM HLUAS – RAU TUS QHIA

Lukas 2

Tej tseem ntsiab lus:

- 1) Tswv Yexus loj hlob nrog niam thiab txiv uas yog Yaxej thiab Malis nyob hauv lub nroog Naxales.
- 2) Txhua lub xyoo lawv puavleej mus koom lub Kevcai Hla Dhau nram lub nroog Yeluxalees. Muaj neeg mus coob heev, vim tsis muaj tsheb lawv yuav tsum mus kotaw ob peb hnuv thiab mus txog nram lub nroog Yeluxalees ua lub kevcai ntawd. Malis, Yaxej thiab Tswv Yexus lawv kuj mus kotaw ib yam li txhua tus rau nram lub nroog ua Kevcai Hla Dhau.
- 3) Thaum ua Kevcai tag, txhua tus rov qab taug kotaw los tsev. Lawv los tau ib hnuv, Malis thiab Yaxej mam li ua zoo saib ua cas tsis pom Tswv Yexus nrog leejtwg ua ke. Nkawd thiab dhia rov qab mus nram lub nroog Yeluxalees nrhiav Tswv Yexus.
- 4) Nkawd mus nrhiav tau Tswv Yexus nyob hauv lub Tuamtsev, tabtom mloog cov yawg Xibhwb qhia thiab nws nug lawv. Yawg Xibhwb qhia Kevcai nyob hauv xav tsis thoob rau Tswv Yexus kev totaub, ua cas ho paub tshaj cov yawg laus no. Malis thiab Yaxej los kuj xav tsis thoob, nkawd nug tias ua cas koj tseem nyob no, ua rau wb txhawj tag.
- 5) Tswv Yexus tias Kuv yuav tsum nyob hauv lub tsev uas Kuv Txiv ua haujlwm. Tswv Yexus yog ib tug menyuam tub hluas mloog lus heev. Nws rov qab los pem lub zos Naxales nrog niam thiab txiv nyob. Nws loj hlob thiab Vajtswv foom koob hmoov rau Nws.

LUS NUG:

- 1) Tswv Yexus loj hlob nyob lub nroog twg?
- 2) Malis, Yaxej thiab Tswv Yexus mus ua Kevcai Hla Dhau rau lub nroog twg?
- 3) Thaum ua Kevcai tag, Yaxej thiab Malis rov los tau petsawg hnuv mam li tsis pom Tswv Yexus?
- 4) Malis thiab Yaxej rov mus nrhiav tau Tswv Yexus qhov twg?
- 5) Tswv Yexus ua dabtsi hauv lub Tuamtsev?
- 6) Yog ua cas Tswv Yexus ho nyob hauv lub Tuamtsev?

LUS TEB:

- 1) Nyob rau lub nroog Naxales.
- 2) Lub nroog Yeluxalees.
- 3) Mus tau ib hnuv kev mam li tsis pom Tswv Yexus nrog lawv ua ke.
- 4) Nyob rau hauv Vajtswv lub tuamtsev.
- 5) Tswv Yexus tabtom mloog cov Xibhwb qhuab qhia hauv Tuamtsev thiab nws nug lawv.
- 6) Tswv Yexus tias Kuv yuav tsum nyob hauv lub tsev uas Kuv Txiv ua haujlwm.